



*Selasa, 17 Nopember 2020*  
**Ogen: Roma 12:1-2**



**Persembahen si Nggeluh**



**S**ecara umum, kerina agama-agama i doni enda mabai pengikutna nggeluh alu mehuli. Manusia eragama ndarami Dibata ras ketenengen guna kegeluhenna. Kerina agama mabai anggotana patuh, mehuli, ndalanken sibujur. Janah kerina agama ersembah man Dibatana dingan maba persembahen. Persembahen lit rubia-rubia, ulih juma, duit ras sidebanna. Nai nini-nininta si er agama pemena, kerina pengikutna nehken persembahen ijapa pe, ingan siniakapna ije Dibata ringan. Terdauhen kenca jadi kalak Kristen kitape nehken persembahen man Dibata. Ibas gerejata GBKP, tep-tep kebaktin kita maba persembahen pengataken bujur man Dibata, PA kategorial, persembahen kerja rani ras sidebanna. Kerina enda jadi pengataken bujur man Dibata si enggo ngalemi kita ibas dosa-dosa nari, si enggo mereken kesehatan, kegeluhen rikut ras erta kebayaken man banta. Kita maba persembahen erkiteken enggo leben Dibata mereken pasu-pasu man banta kerina. Labo gelah ipasu-pasu Dibata maka kita mere man baNa. Megati sibegi istilah 'do ut des' saya memberi supaya kamu memberi, erkiniteken man Jesus Kristus la bage, kita mere erkiteken leben kita ngalo, jadi persembahen labo bentukna sogok tapi pengataken bujur. Kitab Roma sijadi renungenta enda nuriken maka persembahen pengataken bujur e kerina kecibal geluhta: perukuren, pengerana, perbahanen ras kerina totalitas geluh tep-tep wari, 24 jam sada wari. Jadi labo terjeng bentuk benda, barang ntah pe duit sipepulung kita e. Sijadi buah ras bukti arah persembahen singgeluh ndai me. Ngendesken kula jadi persembahen singgeluh ertina ula sitik pe sicurnaken, simelketi kulata enda, sabab e ngena ate Dibata. Ula kita seri ras doni si nterem ncedai ntah ncurnaken kulana. Alu bage sempurna persembahenta iadepen Dibata.

 Baba si mehulina man Dibata eme geluh simehuli